

Morning Regional Dogri News

26 Nov. 2025

09.20 Hrs

Headlines

1. उपराज्यपाल मनोज सिन्हा होरें राष्ट्रीय स्कूल खेडुं दे समापन समारोह दौरान गलाया जे जम्मू-श्रीनगर दे नौजवानें गी कट्टरवाद फैलाने दी कोशश करने आहले खिलाफ इक-जुट होइयै खडोना लोडचदा ऐ।
2. मुखमन्त्री उमर अब्दुल्ला होरें सिडक सुरक्षा गी होर मजबूत बनाने लेई नगरोटा च गड्डियें दी जांच सरबन्धी Automated Vehicle Testing Station दा नींह पत्थर रक्खेया।
3. उपमुखमन्त्री होरें जम्मू-कश्मीर दी दस्तकारी विरासत दी सांभ-संभाल करने लेई 38 कारीगरें गी केन्द्र शासत प्रदेश स्तर दे पुरस्कार कन्नै सम्मानित कीता।
4. कश्मीर च पहलगाम आतंकी हमले मगरा फिल्में दी शूटिंग परितयै शुरु होने कन्नै जम्मू-कश्मीर फिल्म उद्योग इक बारी फही हरकत च आई गया ऐ।
5. समूलचे मुख सनें जम्मू-कश्मीर च बी अज्ज संविधान दिवस मनाया जा रदा ऐ।

<><><><><><>

LG- School Games

उपराज्यपाल मनोज सिन्हा होरें जम्मू-कश्मीर दे नौजवानें गी आखेया ऐ जे ओ उनें ताकतें ते संगठनें खलाफ इक-जुट होइयै खडोई जान जेहडे घाटी च कट्टरवाद फैलाने दी कोशश करा करदे न। कल जम्मू च 69में राष्ट्रीय स्कूल खेडुं दे समापन समारोह गी सम्बोधित करदे होई एल.जी. होरें नौजवानें अगे आह्वान कीता जे ओ समाज च एकता ते इक-जुटता दी भावना पैदा करने लेई कम्म करन- तां जे समाज च फर्को-फर्की गी पूरी चाल्ली खत्म कीता जाई सकै। एल.जी होरें आखेया जे स्थाडे युवा खडारी राष्ट्र दे भविक्ख निर्माता न ते समाज च एकता ते भाईचारे गी बढ़ावा देने च बड़ा अहम रोल अदा करदे न। इस मौके अपने सम्बोधनै च एल.जी होरें इनें खेडुं च हिस्सा लैने आहले खडारियें- उनेंगी सखाने आहलें कोचें ते एहदा कामयाब सरिस्ता करने आहलें आयोजकें गी बधाई ते शुभकामनां बी दितियां।

<><><><><><>

CM Nagrota

मुख्यमंत्री उमर अब्दुल्ला होरें कल खानपुर नगरोटा जम्मू च गड्डियें दी जांच सरबन्धी Automated Vehicle Testing Station दा नींह पत्थर रक्खेया- जेहदा उद्देश्य यातायात ढांचे दा आधुनिकरण ते सिडक सुरक्षा गी होर निगगर बनाना ऐ। इस मौके उपपर बोलदे होई मुख्यमंत्री होरें गलाया जे इस सहूलता कन्नै पारदर्शिता- असरदार ते टैक्नालोजी अधारत गड्डियें दी फिटनैस सरबन्धी सिस्टम कम्म करोग। उनें गलाया जे इयै जनेह केन्द्रें करी सिडक हादसैं च कमी आग ते सुरक्षा नियमे च बाद्दा होग। मुख्यमंत्री होरें आधुनिक प्रणालियें गी अपनाने ते लोकें तगर बेहतर सेवा पजाने दी अपनी सरकार दी वचनबद्धता गी इक बारी परतियै पक्का कीता ते गलाया

<><><><><><>

Dy. CM Awards

उपमुख्यमंत्री सुरिंदर चौधरी होरें कल जम्मू-कश्मीर दी सगोसार दस्तकारी विरासत दे संरक्षण ते नवाचार लेई 38 कुशल कारीगरें गी केन्द्र शासत प्रदेश स्तरीय कारीगर ते बुनकर पुरस्कार 2024 कन्नै सम्मानित कीता। शेरे-कश्मीर अंतराष्ट्रीय कांफ्रेंस सैन्टर श्रीनगर च आयोजत समारोह दौरान एह ईनाम दिते गे न- एहदे च सर्टिफिकेटस-प्रशस्ती-पत्र ते 50 हजार रुपये तगर दा नकद ईनाम शामिल हा। उप-मुख्यमंत्री होरें इस मौके इस शानदार कला गी जिन्दा रक्खने लेई दस्तकारें दी सराहना कीती ते गलाया जे मुख्यमंत्री उमर अब्दुल्ला हुंदे नेतृत्व च इस कला गी म्हेशां सम्मानित कीता जाग। पुरस्कार विजेतायें चा- 18 जम्मू थमां ते 20 कश्मीर थमां न। इस कार्यक्रम च दस्तकारी क्षेत्र गी होर मजबूत बनाने- वैश्विक बजारे तगर एहदी पुज्जत बनाने ते कलाकारें दे आर्थिक विकास गी होर तगड़ा बनाने उपपर चर्चा कीती गेई।

<><><><><><>

JK –Govt. Awards

जम्मू-कश्मीर सरकारै 2026 दे स्टेट अवार्ड- जेहडे गणतंत्र दिवस दे मौके पर दिते जाने न- लेई नामजदगियां मंगी भेजियां न। आम प्रशासनिक विभाग आसेया इस बरे जारी इक अधिसूचना मुजब एह अवार्ड ब्हादुरी- साहित्य- कला- कारीगिरी- समाज –सुधार- सार्वजनिक सेवा- लाइफ टाईम एचीवमैन्ट- खेडु- मीडिया- पर्यावरण- उद्योगिक उद्यमता दे क्षेत्र च दिते जाने न। इंदे लेई नामजदगियां समाजी ते खेडु संगठन- गैर-सरकारी संगठन- युनिवर्सिटियां- प्रशासनिक सचिव ते

जम्मू-कश्मीर कला संस्कृति ते भाषा अकादमी आसेया भेजियां जाई सकदियां ना। एहदे लई खीरी तरीक 15 दिसम्बर 2025 रखी गेदी ऐ।

<><><><><><>

Film Shooting Resumes

कश्मीर घाटी च फिल्मों दी शूटिंग परतियै शुरु होने कन्नै जम्मू-कश्मीर फिल्म उद्योग इक बारी फही हरकत च आई गया ऐ- जेहड़ा पैहलगाम आतंकी हमले दे बाद लोकें अंदर बने दे डर-त्राह दे खत्म होई जाने दी सारत दिंदा ऐ। इनें दिनें श्रीनगर दी मशहूर डल झील पर इक कन्नड़ फिल्म दी शूटिंग चलै करदी ऐ- जेहदे निदेशक ए.आर. विक्थाथ न ते महिमा नाम्बिआर ते गणेश एहदे च कम्म करने आहले मुख अदाकार ना। फिल्म दे डरैक्टर विक्थाथ होरें आखेया जे घाटी च हून कोई डर-त्राह आहला माहौल नैई ऐ ते ओ इत्थें पूरी चाल्ली सुरक्षत मसूस करै करदे ना। ध्यानजोग ऐ जे जम्मू-कश्मीर फिल्म पालसी 2021 दे तैहत फिल्मनिर्माताएं गी केंई चाल्ली दियां राब-रियायतां ते प्रोत्साहन दिते जा रदे ना।

<><><><><><>

IFFI Goa

गोवा च आयोजित भारत दे अंतराष्ट्रीय फिल्मोत्सव IFFI 2025 दे वेव्ज फिल्म बजार च जम्मू-कश्मीर नै अपनी टकोहदी पंछान ते छाप छोड़ी ऐ। सूचना ते जनसम्पर्क विभाग नै वेव्ज बजार च तरमीम कीती गेदी जम्मू-कश्मीर फिल्म पालसी -2024 गी खरी चाल्ली उजागर कीता- जेहदे तैहत केंई चाल्ली दे प्रोत्साहन देइयै फिल्म निर्माताएं गी इत्थे फिल्मों दी शूटिंग लेई औने गितै प्रेरत कीता जा रदा ऐ। सूचना विभाग ते निदेशक नितिश राजोरा होरें दस्सेया जे फिल्म निर्माताएं गी केहड़े-केहड़े प्रोत्साहन- रियायतां- फिल्मां- वेब सीरीज़ ते डाक्युमेंट्रिएं दी शूटिंग लेई दिते जा रदे न- जिसलै जे जम्मू-कश्मीर दे पंडाल च केन्द्र शासत प्रदेश दी कला- सांस्कृति- खान-पान ते सैलानी थाहरें गी बी प्रमुखता कन्नै उजागर कीता गया। इस दौरान 500 कोला मते लोकें इत्थे आइयै फिल्मों दी शूटिंग करने च दिलचस्पी दस्सी।

<><><><><><>

Samvidhan Diwas JK

समूलचा मुख्य अज्ज संविधान दिवस मना करदा ऐ जेहदे लेई इस बरे दा विषय सार ऐ- “स्थाड़ा संविधान -स्थाड़ा स्वाभिमान” मुख्यै दे बाकी हिस्सें आहला लेखा जम्मू-कश्मीर च बी इस ध्याड़े गी मते उत्साह कन्नै मनाया जा रदा ऐ। इस सिलसिले च अज्ज बडुलै 11 बजे सभनें सरकारी दफ्तरें- कालजें ते होरनें इदारे च संविधान दी प्रस्तावना पढी जाहग। जिला मुख्यालय सतह पर विशेष यात्राएं ते द्रौडें दा सरिस्ता कीता जा रदा ऐ- जेहदे च आम लोकें ते टकोहदा करियै नौजवानें गी कन्नै जोड़ेया जा करदा ऐ। इस द्रौड गी नां दिता गेदा ऐ “रन फॉर जस्टिस” लिबर्टी-इक्वैलिटी एंड फ्रेटर्निटी। स्कूलें कालजें च इस मौके विशेष सभाएं दा सरिस्ता कीता जा रदा ऐ जिंदे राएं संविधान असैम्बली च महिलायें दे योगदान गी उजागर कीता जाहग। शैहरें च सार्वजनिक थाहरें कंधें पर संविधान दी प्रस्तावना गी दशदि चित्र वगैरा बी लाए गेदे ना।

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू संविधान दिवस-2025 दे मौके पर अज्ज इक विशेष चर्चा प्रसारित करने जा'रदा ऐ जेहदा विशे ऐ "भारती संविधान च नागरिकें दे बुनियादी अधिकार ते कर्तव्य"। दपैह्नी साड्डे 12 बजे प्रसारत होने आहले इस कार्यक्रम च स्थाड़े परोहने होडन जम्मू युनिवर्सिटी दे लॉ डिपार्टमेंट च असिस्टेंट प्रोफेसर डॉ. रजनीश खजूरिया जेहडे इस विशे पर अपने माहिराना विचार श्रोताएं कन्नै सांझे करडन। इन्दे कन्नै गल्लबात करडन स्थाड़ियां न्यूज एंकर श्रुति खजूरिया। चेता रखेओ एहू कार्यक्रम अज्ज दिनें साड्डे 12 बजे स्थाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाहग।

<><><><><><>